

*“Khawi lama mi  
nge mi tanpuina  
tûr lo thleng ang?”  
Mi tanpuina tûr  
chu LALPA Lei leh  
van siamtu hnêna  
mi a lo thleng ang”  
Sam 121:1,2*

The Official Organ Of PMCF

# PENIEL

*Pune Mizo Christian Fellowship Chanchinbu*



ISSUE 7

21TH JUNE 2009  
penial009@gmail.com

***“Hmalam hunah neih atana I beisei thil aiin vawina I thil neih kha a hlu zawk”***

## LUNGAWINA

*“Kei zawng engkimah lungawi zel ka ching  
tawh si a” Phil. 4:11*

Wawi khat chu Lal pakhat hian a huan a fang vel a, a thlai chu en velin a in bula amah tihlim tura phunsawn tur a zawng kual a. A thlai phunte chu an mahni tawk a an hlut hlawn nen, nimahsela lungawina reng an nei lo. Oak chuan Pine ang a sang leh mawi a ni ve loh avangin “ka lungawi thei lo a ti a. Pine thing chuan, “Grep anga rah thlum ka chhuah ve loh a vangin ka lungawi thei lo” a ti bawk a. Grep pawh chuan, “Mahni a ding zo lo, midangte rinchhan a awm reng mai hi ka lungawi thei lo” a ti a. Geranium pawh chuan, “Lilac anga rintang ka chuan ve hma chuan ka lungawi thei lo ang” a lo ti. Lal chuan, “Aw, ka duh tak a ka phunte vek in ni si a, tumah min tihlim tur in awm dawn lo em ni?” tiin in bula phun sawn tur chu a hmu zo dawn lo em maw ni a ti a. Chutih lai chuan Cherry chuan, “Kei hi ka hniam si a, ka thi hma bawk si, lungawi lohna sawi dawn ila, thlai dang zawng zawng aiin ka nei tam zawk ang. Nimahsela ka nihna angina ka nung a ka lungawi hlah hlah a, Lal in a huana phun ve tlaka min ruat hi ka lungawina ber chu a ni” a lo ti a. Chu ngei chu Lal chuan a pawt a, amah tihlim turin a in bulah a phun sawn ta a.

He thu atang hian zir chhuah tur kan va ngah tak em. Khawvel tihrehawmtu ber chu lungawi theih lohna hi a ni a. Tunlai khawvelah hian lungawi theih lohna hian mahni in tih hlum duhna te a rawn hring chhuak a. Mahni nupuia lungawi lohna avangin hmeithai leh fahrah an tam phah a. Mahni pasal a lungawi lohna avangin Uire-na a pung bawk a. Mahni thil neih a lungawi lohna avangin hlemhletna a pung tial tial a. Hlemhletna avangin kan hausa tial tial a, kan duham tial tial bawk a, duhawmna chuan mi hlim thei tak thin kha mi lungaiha min chanter thin a ni.

Lungawi theih lohna hi Eden huan atanga in tan tawh kha a ni a, khata tang khan mihringte thinlungah lungawi theih lohna kan nei a ni. Kan

thinlungah hian pindan ruak a awm tlat a, chu chu lungawi lohna pindan a ni. Chu pindan chuan neihsa a lungawi tum lovin, a la neih lohah lungawina a zawng a, a la neih loh chu nei mahse thil dang neih zel a duh avangin a lungawi thei chuang lo. Kawvelah hian mi hausa tawtaw millionaire te, multi-millionaire te billionaire te an tam tawh hle a, mahse an neih a lungawi an awm ngai lo. Millionaire pakhat John D Rockefeller-a chuan “Ka sum leh paite mi enah chuan tam hle mahse, ka rilru rethei zia chu kar khat a dollar thum la lut ang a rethei ang tho ka ni” tiin a sawi hial a ni.

Lal Solomona pawh kha kawvel thilah lungawina zawngin nawmsip bawlina tin rengah a in hmang zo a, chhiahhlawh tam tak a nei a, mipa leh hmeichhia zaipawl a nei a, hmeite nen pheii chuan nupui pawh sangkhat a nei bawk a. Pawisate chu lungte hman a hman tur a nei bawk. Israel-te Lal zingah a fing ber a, a finzia hriat tumin ram hla tak atangin hmu turin an lo kal thin a ni. Kawvel thilah hian lungawina leh hlimna a awm a nih chuan Lal Solomona ta tur a ni awm tak a ni. Amaherawh chu hlimna leh lungawina a hmuh lohzia ama twngkam a tang hian a Chiang hle a ni. Thuhrlitu hi chhiar ila, “Thil zawng zawng hi engmah lo mai a lo ni e,” tih hi wawi 23 lai a sawi a ni. A tawpah chuan lungawina leh hlimna kim chu Pathianah chauh a awm tih a hre chhuak ta a, “Ka nun engmah lovah hian engkim ka hmu ta,” tiin lungawina a char ta a ni (Thuh 7:15).

Lungawina chu khawiah nge kan hmuh tak ang? Engtin nge kan neih ang? He zawhna hi kan chhan dik a pawimawh hle a ni. Lungawina kim chu Lal Isua hnenah a awm a, a duh apiangte ten neih theih a ni. Chu lungawina chu Tirhkoh Paul-a hian a nei Chiang hle a ni. “Ka tlakchham thu sawi ka ni love, kei zawng eng ang pawh in awm mah ila, lungawi zel ka ching tawh si a. Tlawm tak a awm dan ka thiam a, hausa a awm dan pawh ka thiam bawk a.....Mi tichaktuah chuan engkim ak ti thei a ni (Phil 4:11-13) a ti a.

(Cont on next page)

***“Dawhtheihna, nghah hram hramna chuan hlawhtlinna rah an seng thin”***

**Editors**

**Paul Lalthuamsanga**  
9922689606  
**Hmangaizuala Pachuau**  
9730670481  
**Lalnunfela**  
9970231904  
**R.K. Vanlalhrauaia**  
9921291368

**Editorial...**

*Tlin lohna leh fel lohna tam tak nen kan han kal chho ve zel chu a ni a, memberte duh khawp lohna tam tak kan nei ngei ang tih kan ring, hetih kawngah hian memberte fuihna leh thurawn dawng turin kan inhawng reng a. Thil*

*tha nia kan hriat chu ngawih bo pui mai lovin in hriat-tir thin ni sela, chu chuan hmasawna kawngah min hruai ngei a rinawm. Thu ziak kawngah erawh kan tan tlan a ngai hle niin a lang. Kan chanchinbu pheh tlemte hnawh khahna tur thuziak an awm miah lo thin hi chu member heti zat awm siah chuan a zahthlak deuh a ni. Kan zingah thu ziak thang tak tak kan awm tih kan hria inthlahrung hauh lova thu lo ziak thin turin kan in sawm a, chutih rualin ziak ngai lote pawhin in zirna hun remchang a ni tih hria in, he hun hi hmang tangkai ila, midang tih tura dah mai lovin mahni ngei chet chhuah i tum ang u. Pathian thu kher ziah tur kan hre lo a nih pawh in thu tha nia kan hiat chu a leng vek tho a ni. Keini editorial memberte chu ka phur tlang hle a mahse memberten min phur pui ve loh chuan kan lo phurna hian engmah a nei dawn lo a ni. Chuvangin, ringtute chu inchawkphur tawn tur kan nih angin, hawh u, i in chawphur tawn ang u.*

**TUALCHHUNG**

- Nimin ni 20/6/2009 khan PMCF Sport sub committee chuan Pu A Chhawnmawia te inah committee an nei. An thu rel zing a langarte chu – PMCF football team in din leh nise Coach atan Pu Lalhmingmawia, captain atan Tv. Chhahlai an ruat. Kartin Zirtawp tlaiah Wanowari ground-ah practice nise tiin an rel. Sum tuak nan chawlhni inkhawmnaah ei tur zawrh thin nise an ti. Hengte hi PMCF Executive committee-ah la thlen tur a ni.
- Pu T.Vanlalchhuanga, Headmaster, Presbyterian Mission High School, Assam Mission Field chu a fate admission buaipuiin Pune-ah a cham mek.
- Pu Rinliana chuan Car thar tha tak mai a lei ta.

“Lal Isua chu nimanah a thi a, vawiinah a tho leh a, naktukah a lo kal leh ang”

- Martin Luther

**FINANCIAL REPORT (Mar 2009 - Jun 20, 2009)**

Opening Balance	1,57,991
Total Income	76,246
Total	2,34,237
Expenditure	48,639
Closing Balance	1,85,598

Cont.....

Mihringte hian kan mamawh ber chu hausak a ni lova dam rei a ni hek lova, in leh lo tha a ni hek lo. Engkim a lungawi theih zel hi a ni zawk. Chu chu Paula hian a nei Chiang hle a ni. Pathian thu hi a hahthlak tawh chauh in a nunpui ve lova. A takin a nunpui zawk thin a ni. A retheih pawhin rethei a awm dan a thiam a, a hausak pawhin awm dan a thiam bawh a, miin an sawi chhiat pawhin mite sawi chhiat laia awm dan a thiam a, an fak lai pawhin fak laia awm dan a thiam a, tih duhdaha a awm lai pawh in tih duhdah a awm dan a thiam bawh a ni. Hei hi eng dang vang a ni lo Lal Isuaah lungawina tak chu a char tawh zawk vang a ni. He khawvelah hian lungawina te, hlimna te zawng thin mah ila. Hlimna tak tak kan hmu dawn chuang lo a ni. Chuvangin Hlimna tak tak neitu Lal Isua hi pan ila, Paula ang hian ‘Eng ang pawhin awm ila lungawi zel ka ching taw’ tiin kan sawi ve thei dawn a ni.

**PMCF MEMBER PASS THARTE:**

- Remsangpuii Chinzah II LLB
- Lalnunfela I LLB
- R.Lalrempuii VI BSL
- J Lalremtuanga I B.Com
- Asiara Nohra I B.Com
- Lallawmawma I B.Com

**PMCF MEMBER THARTE:**

- Pastor Chuahkhu Khiehie M.Th (Ministry) Zirtur
- Maria Lalrinsangi, I BA zirtur
- Gideon Lalrinsanga, I BA zirtur
- Christina Lalrempuii I BA zirtur
- T.T Nopha (Apha) IX zirtur
- Lalmachhuana I BA zirtur.

**BIHCHIANNA**

- Hming : Chuahkhu Khiehie
- Pa Hming : K. Thawngduna
- Nu Hming : Chhawnkungi
- Pianna : Tuipang (V)
- Zirna : B.D JRTS Shillong 2004  
M.Th (Ministry) UBS-ah a zir mek
- Rawngbawlna : 2004 - Pro Pastor, Khakhang bial  
2005 - Pro Pastor, Kaki Bial  
2006 - Secretary, ECM KTP  
2007 - Pastor,(Ordinate) Lato Bial  
Asst. Secretary, Gospel Centenry  
2008 - Hmawngduh bial

Pastor Chuahkhu Khiehie, Tea tia koh thin hi unau paruk zinga upa ber niin nau mipa pathum leh hmeichhia pahnih a nei. A Bible chang duh ber chu John 15:16 a ni a, a hla duh chu “Krista vanga tuar ngam” tih a ni. Amah hi fiamthu duh tak a ni a, infiam ngaina mi tak a ni baw. Zai a ngaina em em a, zaipawl conductor hial a lo ni tawh a ni. Tunah hian tlangval a la ni a, mahse nupui neih a tum hnai tawh ni in kan hria.

**KHAWVEL A CHANCHINTHA DINHMUN:**

- Khawvelah mihring tluklehdingawn 5.8 vel zinga tluklehdingawn 1.2 vel (20%) hian Chanchintha hi an hre tawh.
- Tawng lian zual 370 (mihring maktaduai khat aia tamin an hman chin tawng) zinga tawng 210 te hian Kristian hi an la hre lo.
- Kum AD 100 hunlai vel khan mi 360 zingah Kristian hi pakhat zel awm ang a chhut a ni a. Tunah chuan khawvela mihring 5 zela pakhat vel hi Kristian kan ni tawh.
- Pathian thu hriltu 70% vel hi ram hnufual a chengte an ni baw.
- Khawvelah hian Missionary 332000 vel an awm a, heng zinga 328000 vel hi chanchintha hre

tawhte bula khawsa an ni a, ramthim Pathian la hre miah lo bula rawngbawl tak chu mi 4000 vel chiah an ni.

- Tunah hian ring lo mi 400000 tan Missionary 1 zel awm ang a ni.
- U.S.A ram khuan missionary rawngbawl nana an pawisa hman let 60 a tam zu in nan an hmang ral a, missionary chawm nana an pawisa hman let 18 zeta tam hi an ran enkawl nan an hmang ral ang a chhut a ni baw.

(Source : misual.com)

**LAWRKHAWM**

- June 14 khan Madhia Pradesh thingtlang khua pakhat Ram Puria-a Hindu hoin Pastor leh a nupui leh a fate an nghaisa. He thil hi chhun dar 11 vel a thleng a ni a. Hindu pawl Rashtriya Swayam Sevak (RSS) leh Bajrang Dall zinga mi 40-50 velin Biakin a tawngtai inkhawm an neih lain an lut a. Pastor Kuldeep Daniel chu zawngin an sawisa nghal ta a ni.
- June ni 7 2009 khan Vietnam a Huan Yen province a Agape Babtist kohhran ten inkhawm an neih lai chu police ten tibuaiin inkhawm ho an vua chiam a. Pastor leh Upa-te ho chu an man nghal a, a hrang theuh a dah in police panga velin an sawisa hrep a ni. Helai hmuna ringtute chuan April atang khan tih duhdahna chi hrang hrang an tawrh tawh thu an sawi.
- June 12 2009 chhun dar 11 vel khan Hindu pawl mi 20 vel in kristiante inkhawmnaah lutin Pastor Nagaraj leh midang pathum an sawisa. Heng mite hian Pastor leh a thiante hi ringlo mite kristian a inlet tur a pawisa hmang a thamah an puh a ni.
- Pastor Captain Samuel (70) chu ni 20 lai jail a an tantir hnuin police ten nasa takin an sawisa. Pastor Samuel hi Hindu hoten ringlo mite kristian a inlet tur a tiluia an puh avangin thla hmasa khan Jammu & Kashmir thlingtlang khua pakhat Bashi-ah an man a ni.
- Central sawrkar chuan “anti-conversion bill” BJP sawrkar-ten an introduce chu dan behtlat an tum. P.Chidarambam chuan hemi chungchangah hian nghet taka din tlat a tum thu a sawi.

**FIAMTHU**

- Vawi khat chu mi pakhat hian pastor hnenah, “Meizail zu chung hian vanram ka kal thei ang em?” tiin a zawt a. Pastor chuan, “Thei e, I kal hma phah zawk maithei” tiin a chang.
- A tirin Pathanin kawvel a siam a, a chawl ta a. Ti-chuan mihring a siam leh a, a chawl leh a. Hmeichhia a siam leh a, chumi hnu atang chuan a chawl leh tawh ngai lo.
- Q: Pathian in engvangin nge hmeichhia aiin mipa a siam hmasak  
A: Thurawn pek a duh lo.
- Nu pakhat leh Pope hi thlawhna in an zin dun a. Chutih lai chuan thli a lo tleh ta chiam mai a, an thlawhna chu thli chuan a rawn sawi nghing dur dur a. Chu nu hlau lutuk chuan Pope hnenah chuan, “Tih theih eng emaw tal I nei lo em ni” tiin a zawt a, Pope chuan, “Kei chu Sales ka ni a, Management-ah ka awm lo a” tiin a chang daih a.
- Vawi khat chu tlang ram hmun mawi takah hian mi pathum Pastor, Artist leh Cowboy an kal a. Pastor chuan, “He lai hmun chuan Pathian thil siam mawi zai a va tilang Chiang em!!” a tia. Artist chuan, “Lem ziahna atan a va tha dawn em” a ti a. Cowboy ve thung chuan, “Bawng bo zawn a va khirh duh dawn ve” a ti ve duh chauh.

**Vanram kan kal chak chhan tur chu -**

- Kan Pa a awm (Mat. 6:9)
- Kan chhandamtu a awm (Heb. 9:24)
- Kan in a awm (John 14:2)
- Kan hming a awm (Lk. 10:20)
- Kan nunna a awm (Kol 3:3)
- Kan ro a awm (Mat 6:21)
- Kan lawmman a awm (Mat 5:12).

“Pathian leh Bible tel lo chuan ro a rel dik theih loh”

- George Washington

“Bible chhiar fimkhur ngai lo chu a nung fimkhur ngai lo”

- Max Reich

“Bible hi fin nan chhiar la, inhumhim nan ring la, thianghlim nan nunpui rawh”

- Francis de Sales

**PHUNNAWI SUH**

- I zirilaiah i thiam thei lo a nih chuan phunnawi suh. Lehkha zir chak em em mahse zirna tur nei zo lo tam takte ai chuan i vannei daih zawk
- I chawhmeh a tui loh avangin phunnawi suh. Khawvelah hian mi tam tak ei tur nei lovin riltam in an awm asin.
- Eng emaw vangin ke a thui tak i kal a ngai a nih pawh in phunnawi suh. Ke kal chak em em kalna tur nei si lo khawvelah hian an tam asin.
- I hmangaih nen in inthen a nih pawhin phunnawi suh. He khawvelah hian hmangaihtu mamawh em em, hmangaihtu pakhat pawh hmu zo lo tam tak an awm asin.
- I thil neih zinga thenkhat i hlauh a nih pawhin phunnawi suh. He khawvelah hian neih engmah nei lo mi tam tak an awm asin.

**HRIAT VE MAI MAI ATAN**

- Scientist-te chuan thil kan ngaihtuah tam poh leh kan I.Q a sang thin an ti.
- Pen khat pen tur hian thahrui 200 kan hmang.
- A tlangpuiin hmeichhia te hi mipa aiin 5 iches in an tawi zawk.
- Mihring pumpui a acid hian in ziahna blade hi a pai tawi thei.
- Mihring thluak hian Encyclopedia Britanica ami let 5 a vawng thei.
- Thil kan ei hi kan ka atanga pumpui thleng tur hian second 7 a ngai.
- A tlangpuiin mumang hian minute 2-3 chauh a awn thin.
- Mihing in lumna kan taksa atanga minute 30 chhunga a pek chhuah hian tui gallon chanve a ti lum thei.
- Ha hi kan pian hma thla ruk atangin a to tan thin.

“Natna zawng ka nei na meuh mai a, nimahsela ka nunna a khawih buai lo. Muanna, muanna chu a kim ta.  
- Richard Baxera

“Lalpa, thihna in min chim mah se, I kuta ka awm ni atang khan ka lungawi tawh tak zet mai”

- John Calvina.

“Thihnain thamna a la ngai lo.” - Benjamin Franklin.